

# Squitsch e restricziuns il medem mument

Il chantun Grischun adattescha sias prescripziuns da chatscha davent da l'atun proxim. Las novas prescripziuns prevedan dapli squitsch da chatscha sin la selvaschina d'ungla en tshertas regiuns dal Grischun. El medem mument datti – sco gia l'onn passà – restricziuns per la chatscha sin chamutschs e chavriels en Surselva.

MARTIN GABRIEL/FMR

I saja ina pulita sfida da resguardar tut ils bassegns ed interess en las prescripziuns da chatscha, ha *Adrian Arquint*, il schef da l'Uffizi chantunal da chatscha e pestga, ditg il mardi a la FMR. «D'ina vart vulain nus garantir ina chatscha grischuna attractiva che dat motivaziun a la chatschadra ed al chatschader. Da l'autra vart datti prescripziuns per cuntanscher finamiras. Igl è pelvair betg simpel da chattar qua in bun equiliber.» Tenor Adrian Arquint èsi dentant cler, che las chatschadras ed ils chatschaders stattan el center er tar las novas prescripziuns da chatscha. Chatschadras e chatschaders stoppian avair success cun la chatscha e pudair sajettar animals.



Chatschadras e chatschaders ston uonn sajettar 5430 tshiervs.

FOTO OLIVIA AEBLI-ITEM

## 5430 tshiervs sco directiva

Tenor las novas prescripziuns da chatscha ch'èn vegnidas publicgadas il mardi sto vegnir sajettà en l'entir Grischun 5430 tshiervs l'atun 2022. La populaziun da tshiervs è dapi ses maximum l'onn 2019 vegnida reducida per 6% (960 tshiervs). Il manader da l'Uffizi chantunal da chatscha e pestga, Adrian Arquint, discorra d'in act da ballantscha tranter reducziun da la selvaschina d'ungla e la protecciun dal gaud. Malgrà ch'i saja gartegià en las regiuns cun problems tranter gaud e selvaschina da reducir la populaziun da tshiervs, stoppia l'effectiv tuttrina vegnir reduci vinavant sin in aut nivel.

## La selvaschina guntgescha il luf

La preschientscha dal luf ha influenzà las novas prescripziuns da chatscha. Tenor Adrian Arquint guntgeschian ils tshiervs il luf en territoris nua ch'il luf saja fitg preschent. «Il luf influenzescha fitg il cumportament da la selvaschina. En quella regiun ch'il luf è fitg preschent è la chatscha pli difficila. E per consequenza èsi er pli grev per nus da cuntanscher las finamiras.» Plinavant èsi tenor Arquint daventà pli cumplitgà da dumbtrar ils effectivs da selvaschina pervia dal luf. «Ils problems areguard il luf en per franc anc pli gronds en l'agricultura che tar ils chatschaders. I constat dentant, ch'il luf ha in'influen-

za sin la chatscha, sin las dumbraziuns e sin la planisaziun.»

## Restricziuns tar chamutschs e chavriels en Surselva

Pervia da la situaziun gaud-selvaschina predominanta e pervia da las grondas populaziuns en tshertas regiuns ston en differentas regiuns da gaud er vegnir sajettads dapli chavriels e chamutschs. Tenor las novas prescripziuns da chatscha 2022 na vala quai dentant betg per la Surselva. Surtut pervia da malsognas e pervia da la preschientscha dal luf e dal luf-tscherver è l'effectiv da chamutschs e chavriels fitg pitschen. «Jau hai chapientscha per la situaziun da las chatschadras e dals chatschaders da chav-

riels e chamutschs da la Surselva. Nus avain qua ina situaziun fitg stentusa. Ma nus na pudain betg influenzar las malsognas dals chamutschs, nus na pudain betg influenzar la populaziun dal luf e dal luf-tscherver e nus na pudain er betg influenzar envierns dirs.» Per la chatscha da chamutschs e chavriels en Surselva na dettia dentant nagut auter che d'avair pazienza e sperar che la situaziun sa megliereschia. Actualmain vala ina reducziun dal temp da chatscha e la protecciun da la chaura da dus onns sur la lingia d'atezza. En il mender cas dovria quai l'onn proxim perfin anc dapli mesiras, ha Adrian Arquint ditg. Ma per 2022 restian las directivas per la chatscha da chamutschs e chavriels en Surselva las medemas sco l'onn passà.

«Nus na pudain betg influenzar las malsognas dals chamutschs, nus na pudain betg influenzar la populaziun dal luf e dal luf-tscherver e nus na pudain er betg influenzar envierns dirs.»

Adrian Arquint, manader da l'Uffizi chantunal da chatscha e pestga